

Fixà la politica d'asil per l'avegnir

(anr) Represchentants da la confederaziun, dals chantuns e da las vischnancas han sancziunà da curt tar ina conferenza d'asil a Berna il rapport per structurar da nov las directivas principalas che pertutgan dar asil. En ina declaranza vegn fixà co la confederaziun, ils chantuns e las vischnancas han prendì en mira dad exequir l'entira planisaziun. Quai duai succeder fin la fin da 2013. Cuntegnids en quel concept èn spezialmain ils lieus, ils centers da dimora sco per tals che han da bandunar il pajais ed era centers per asilants propi renitents.

Quels che han prendì part da quella

conferenza d'asil preferessan la varianta che preveda tschintg regiuns cun plirs centers che avessan mintgamai plaz per 400 asilants. Quai dess alur la pussaivladad da dar suttetg a 6000 personas en centers che vegnissan manads en cumpetenza da la confederaziun.

Per simplifitgar la procedura da construcziun vulan ins examinar ina procedura per approvaziun tras la confederaziun. L'Associaziun da las vischnancas svizras sustegna spezialmain quellas mesiras per pudair exequir e terminar dapli proceduras che fin oz en ils centers da retschaviment e nua ch'i vegn la finala decidì.

Las directivas principalas per la strategia preveda correspundan a las pretensiuns ch'ins fa dapi onns, numnadamain da pudair proceder spert, fair e consequentamain.

Quai effectuescha che be carstgauns che basegnan propi protecziun vegnissan repartids sin las vischnancas e che han alur il dretg da restar qua.

Ils participads a la dieta mettan gronda paisa sin proceder ed agir cooperativamain e tripartitamain tranter confederaziun, chantuns e vischnancas – e quai davent da la planisaziun fin la realisaziun.